



DRUŠTVO ARHITEKATA TUZLANSKOG KANTONA

Zgrada Kantonalne privredne komore Tuzla / Trg Slobode bb 75000 Tuzla

Poštovani kolega,

uz poziv i molbu da prisustvujete Redovnoj godišnjoj skupštini Društva arhitekata Tuzlanskog kantona, koja bi trebala biti održana **30. novembra/ studenog 2013.godine, u 10 sati, u velikoj sali Privredne komore**, želim Vas podsjetiti da je rad našeg Udruženja obnovljen 21. aprila/travnja 2012.godine.

Na obnoviteljskoj skupštini prisustvovalo je 55 arhitekata i tada smo izabrali sve organe Društva, koje po usvojenom Statutu bira Skupština Društva.

Svjedoci smo da je prošlo 19 mjeseci od obnoviteljske skupštine, a ovaj period protekao je u nastojanju nekoliko naših kolega da održe kontinuitet rada Društva i obavljanju niza redovnih i vanrednih aktivnosti, koje su bile sastavni dio obaveza preuzetih prihvatanjem članstva u Savjetu. U ovom periodu održano je 18 sastanaka Savjeta, na koje sam kao predsjednik Skupštine Društva redovno pozivan. Lično sam prisustvovao većini sastanaka Savjeta, na kojima se raspravljalo o nizu aktualnih pitanja, ali je primijetno da jedan broj članova Savjeta nije prisustvovao većini održanih sastanaka.

Nažalost, živimo u vrlo "zapuštenom" prostoru i vremenu, kada u našoj Državi mnogo toga ne funkcioniše, vremenu u kojem vlada opšti poremećaj vrijednosti, i kada su sredstva informisanja prepuna informacija o korupciji i nemoralu u svim "porama" našeg društva. Naš glas, u tako nagomilanim problemima teško se može čuti, a još teže saslušati.

Oblast u kojoj mi djelujemo; od prostornog planiranja, izrade detaljnih urbanističkih planova i njihovog provođenja kroz općinske službe prostornog uređenja - do projektiranja objekata, građenja, kontrole izvođenja, pa sve do tehničkih pregleda, opterećena je nizom problema koje vrlo često i sami proizvodimo. Zbog toga su nam potrebni međusobni susreti i otvoreni kolegijalni razgovori, kako bi kroz razgovor, dogovore i javne istupe, pokušali uticati na okruženje koje bi sa vremenom prepoznalo naša pozitivna nastojanja u kreiranju i uređenju prostora u kojem živimo i djelujemo.

Naše generacije žive u teško vrijeme krize građevinarstva, ali i ne samo građevinarstva, jer je u prošlom društvenom sistemu bilo periodičnih kriza u ovoj oblasti, ali je sadašnje vrijeme opterećeno opštom društvenom krizom, siromaštvom i velikim socijalnim razlikama.

Moramo znati da se niko za nas neće izboriti, ako mi to sami ne uradimo. Smatram da trebamo pokušati i stalno pokušavati pozitivno djelovati, uz međusobne dogovore i veća međusobna razumijevanja u poslovima na kojima radimo.

Na našim sastancima trebamo otvoriti pitanja poslovnog morala i poštovanja svih vrsta stručnih znanja, prvo među nama kolegama, pa tim primjerom pokušati uticati na naše odnose sa predstavnicima vlasti i investitora.

Trebamo imati na umu, da poslovi koje radimo dugoročno ostaju kao zapis našeg djelovanja i pojedinačnog prepoznavanja u oblasti struke, a u tim poslovima često je oslikan karakter i moral njegovih sudionika.

Možda nam je svima lakše da se ne opiremo nasrtajima primitivizma i nepoštivanja struke i znanja na svim nivoima, ali ipak mislim da smo dužni djelovati i onda kada to teško ide, ali i onda kada ta djelovanje nije u skladu sa našim pojedinačnim interesima. Mislim da je velika odgovornost nas kolega, koji u sadašnjem vremenu izgrađujemo raspoložive prostorne resurse, a naslijedili smo ih od kolega koji su ih znali više vrednovati.

Ovo je samo dio mojih razmišljanja, za koja mislim da bi Vas mogla motivisati da dođete na zakazanu redovnu Skupštinu Društva, na kojoj pored evidentnih opštih problema, možemo razgovarati i o zajedničkim putovanjima, posjetama sajmovima i raznim vrstama skupova naše profesije. Aktivan rad Društva zahtijeva aktivno učešće većeg broja članova Društva, uz redovne uplate članarine i obezbjeđenja sredstava kroz druge vidove naših aktivnosti.

Želim da zajednički pokušamo, a napredak će se osjetiti u našem , ili u vremenu poslije nas.

Uz srdačan kolegijalni pozdrav,



Husejn Dropić, predsjednik Skupštine DATK

PS.

Za ovu redovnu Skupštinu predviđen je sljedeći dnevni red:

- Izvještaj o radu Savjeta Društva periodu od aprila/travnja, 2012. do novembra/studenog 2013. godine
- Finansijski izvještaj
- Izbor novih članova Savjeta (umjesto članova koji nisu prisustvovali većini održanih sastanaka)
- tekuća pitanja

Tuzla, 11. novembra/studenog 2013.godine